



UDRUGA SPORTSKIH RIBOLOVACA "VITEZ"

žiro račun: UniCredit Banka BH: 3382502200395477 • ID br.: 4236178890008 • info@usrvitez.ba • www.usrvitez.ba
mob: 063/809-145 predsjednik, 063/288-500 tajnik, Lašvanska b.b. Ribarski dom • 72250 Vitez • BiH

IZVJEŠTAJ

O radu Udruge sportskih ribolovaca "VITEZ" za vremenski period
od 01.01.2019. - 31.12.2019. godine

UVOD

U 2019. godini planirano je od uzgoja mlađi potočne pastrmke ostvariti određena financijska sredstva kroz suradnju sa drugim ribolovnim udruženjima. Na zadnjoj Skupštini održanoj početkom 2019. najavili smo poribljavanje rijeke Lašve koje smo planirali izvršiti od sredstava ostvarenih od uzgoja mlađi potočne pastrmke. Na žalost u prvoj polovini 2019. godine imali smo 3 poplave za redom pri čemu je došlo do velikih šteta u mrijestilištu te smo izgubili preko 150.000 komada mlađi potočne pastrmke, dio matičnog jata potočne pastrmke i 5 mladica, a nastupile su i štete na infrastrukturi samog mrijestilišta. Iznos štete samo u mlađi je oko 15.000 KM, a procjena koju je izvršila komisije Općine iznosi nešto preko 20.000 KM. Ova sredstva su bila planirana pored nabavke ribe za poribljavanje i za angažiranje jednog ribočuvara. I pored ovako velikih šteta uspjeli smo ispoštovati sve obaveze, poribiti skoro sve vodotoke na našoj teritoriji, te sanirati većinu šteta volonterskim radom članova kao i uz pomoć volontera lokalne zajednice, drugih udruženja i radnim akcijama organiziranim u suradnji sa općinom Vitez.

U sezoni 2019. godine imali smo stalno zaposlenog jednog ribočuvara. U 2019. godini USR Vitez je imala 112 članova što je za 6 članova više nego u 2018. godini

Održano je 7 sastanaka UO i na svakom sastanku su bili prisutni članovi NO, kao i 2 sastanka sa Komisijom za poribljavanje. Na sastancima sa članovima Komisije za poribljavanje donešen je Plan poribljavanja u nekoliko faza i to rijeke Lašve u 2 faze, poribljavanje sa mlađi potočne pastrmke iz našeg mrijestilišta rijeke Kruščice, svih pritoka Kruščice i pritoka rijeke Lašve, poribljavanje Lašvice iz naknade pričinjene štete i poribljavanje mušičarske staze kroz odobreni tender koji financira općina Vitez.

Evidentni rezultati rada Udruge sportskih ribolovaca Vitez je prepoznat i od nadležnih institucija (Federacije, Kantona, općine Vitez, ribolovnih saveza i ostalih ribolovnih udruženja) te je i podrška u radu sve veća i kvalitetnija kroz pozive na tendere kao i donacije.

EKOLOGIJA, ZAGAĐENJA I INCIDENTI

Na polju ekologije i zaštite voda USR Vitez je i u 2019. godini učinila mnogo te je podnijela veći broj prijava nadležnim općinskim, kantonalnim i federalnim inspekcijama u slučajevima zagađenja i devastiranja rijeke Lašve i pritoka, neodgovornim radom MHE, stvaranja divljih deponija... Prijave policiji, kantonalnoj i federalnoj vodoprivrednoj i okolinskoj inspekciji su podnošene uz materijalne dokaze sa snimljenim fotografijama i video zapisima zagađivača, a dio prijava smo uspjeli i naplatiti putem odštetnih zahtjeva te su sva sredstva uložena u poribljavanja.

POPLAVE

U 2019. godini imali smo niz od 3 uzastopne poplave na našem ribolovnom području:

- 03.02.2019. godine desila se prva poplava. Zbog ogromnog vodostaja izvršeno je prokopavanje puta prema ribarskom domu kod mosta na ušću Kremenika u Lašvu, gdje je voda poplavila pristupni put, kako bi se spriječilo plavljenje naselja. Pri tom je došlo do prekida vodovodnih cijevi. Zbog velikog vodostaja Kremenika (začepljenje ispod objekta FIS i uskog grla ispod mosta na ušću Kremenika)) visina vode na mrijestilištu je bila oko 1 metar iznad vanjskog i unutarnjih bazena. Brzom intervencijom predsjednika

sprječene su totalne štete (izvršeno je pokrivanje vanjskog i unutarnjih bazena), a kasnije uz Naserovu pomoć je ispumpana voda iz objekta te je dio mlađi koji je izašao iz bazena vraćen nazad. U samom objektu mrijestilišta došlo je do štete na oko 20% mlađi potočne pastrmke. Dana 02.03.2019. godine izvršena je akcija kontrolnog izlova agregatom uzgojnog potoka na mrijestilištu USR Vitez kako bi utvrdili obim štete na matičnom jatu potočne pastrmke. Rezultati su pokazali da nakon poplava nedostaje oko 50% jedinki matičnog jata. Iz tog razloga akcija izlova je nastavljena i na dijelu potoka Kremenik iza FIS-a gdje smo pronašli još 10-ak jedinki potočne pastrmke. Sretna okolnost je da smo 2017/2018 počeli sa formiranjem novog matičnog jata koje je pretrpilo minimalnu štetu jer su bazeni u objektu pokriveni mrežama. Izgubili smo i 5 jedinki mladica koje su bile poklon SRD Banja Luka. Na obalama poslije poplave je ostala ogromna količina smeća.

- 14.05.2019. godine došlo je do druge poplave. Ponovo smo se morali boriti da spasimo što se može. Nastradao je ponovo jedan manji dio mlađi, a matično jato je sačuvano. Najviše su nastradali vodotoci rijeke Kruščice.

- 01.06.2019. godine je došlo do treće poplave i ovaj put smo imali i najveću štetu na mrijestilištu i vodotoku nizvodno od MHE koja je izvršila naglo pražnjenje akumulacije zbog opasnosti od pucanja brane. Obzirom da je glavni vodni val došao sa strane starog Fisa te je sapiranjem glavne prometnice došlo do pojave veće količine mulja kao i benzinskih i uljnih fleka nastradala je mlađ u velikim količinama obzirom da se nalazila u najosjetljivijem uzrastu. Uginulo je oko 150.000 komada mlađi potočne pastrmke i nekoliko jedinki matica potočare.

- 16.09.2019. desio se jedan od najtežih ekocida na slivu rijeke Lašve. Pregrađena je tzv. Mala Lašva (Lašvica) u naselju Mošunj, te je tim činom potpuno isušen ovaj dio toka rijeke Lašve kao jedno od rijetkih preostalih prirodnih mrijestilišta mladice, lipljena i pastrmke. Dojavu smo dobili od našeg člana te je predsjednik USR Vitez je postupajući po propisanim zakonskim procedurama izvršio fotografiranje i snimanje lica mjesta, a slučaj je prijavljen Policijskoj stanici Vitez čiji su pripadnici odmah izašli na teren i izvršili uviđaj na licu mjesta. Također je izvršen je uviđaj na osnovu naše prijave i od strane nadležne kantonalne inspekcije. USR Vitez je uputila pismeni zahtjev da se po okončanju postupka ovaj dio Lašve vrati u prethodno stanje, da se namiri počinjena šteta, a odgovorne osobe procesuiraju. 26.09.2019. godine Lašvica je vraćena u korito tj u prvobitno stanje. 09.10.2019. godine Mala Lašva u Mošunju je poribljena cijelim tokom potočnom pastrmkom. Sredstva su obezbjedjena od propisane i naplaćene kazne za počinjenu štetu. Zahvaljujemo se svima koji su nam pomogli, od članova na dojavi, Policijskoj stanici Vitez na brznoj intervenciji i Kantonalnoj inspekciji poljoprivrede, vodoprivrede i šumarstva SBK/KSB. Posebna zahvala ide našem predsjedniku Dragan Jonjic koji je, tko zna koji put, uradio sve da se spasi i vrati u život ugroženi dio rijeke Lašve.

- Prijave su podnešene i za 2 MHE za počinjenu štetu nastalu naglim ispuštanjem akumulacija pri poplavama. 20.08.2019. podnešena je i prijava protiv MHE Lašva (ušće Kruščice u Lašvu) koja je izazvala pomor ribe nizvodno od brane prema Busovači. Kantonalna inspekcija je utvrdila da je uzrok pomora naglo pražnjenje akumulacije na brani mini hidrocentrale nastalo usljed kvara ili nepravilnog rukovanja. Šteta je naplaćena u iznosu od 1.000 KM

- 18.04.2019. desila se provalna krađa u šupu Ribarskog doma te su tom prilikom otuđeni 3 trimera za košenje, motorka te kompletan alat. Uviđaj su izvršili djelatnici PS Vitez koji su sačinili Zapisnik. Obzirom da je objekat bio osiguran od krađe prijavili smo štetni događaj osiguravatelju, ali smo dobili odbionicu iako smo uvjeravani da su sve stvari osigurane od krađe, a iste su i fotografirane.

- U nekoliko navrata je ponovo bilo devastiranja (lomljenja) sadnica uz Ribarski dom i na obalama staze, kao i većih količina smeća i razbijenog stakla koje za sobom ostave nesavjesnih pojedinci. Iz tog razloga smo izvršili nekoliko kontrola te smo popričali sa zatečenim osobama čime se smanjila pojava devastiranja okoline Ribarskog doma.

SURADNJA SA NADLEŽNIM SLUŽBAMA I DRUGIM NVO

Ostvarena je odlična suradnja sa federalnim i kantonalnim inspeksijskim službama. Suradnja sa Općinom, načelnikom i općinskim službama Viteza je na zavidnom nivou. U 12. mjesecu 2019. izvršena je redovna inspekcija rada Udruge i mrijestilišta od strane federalne i kantonalne inspekcije, a uzorke mlađi i ovarijalne tekućine matičnjaka za analizu su uzeli kantonalni vodoprivredni inspektor te stručnjak sa sarajevskog fakulteta za ihtiologiju te su isti poslani na analizu, a sačinjen je i Zapisnik o nadzoru. Objava sa fotografijama se nalazi na web stranici Udruge.

- Nakon raspisanog tendera općine Vitez dobili smo molbu od Hrvatske udruge mladih Središnja Bosna da im odobrimo realizaciju projekta u našu korist, što smo i prihvatili, te smo im na svim akcijama pomogli svojim učesćem i savjetima. Rezultat ovog projekta su nekoliko akcija čišćenja i uređenja mušičarske staze, novih 6 klupa na mušičarskoj stazi te veći broj sadnica magnolija i hrastova na obalama. Zahvaljujemo se HUM što su nas odabrali za svoj projekat.

PORIBLJAVANJE

U prethodnoj 2019. godini smo planirali izvršiti poribljavanja, kako je rečeno u uvodu, od suradnje pri uzgoju mlađi potočne pastrmke sa udruženjima SBK/KSB što smo i najavili na zadnjoj Skupštini održanoj početkom drugog mjeseca 2019. godine. Količina mlađi koja je izmriještena krajem 2018. i početkom 2019. godine je bila dovoljna da ostvarimo sve planove poribljavanja kao i da angažiramo još jednog ribočuva. Nažalost desile su se 3 uzastopne poplave pri čemu su nastale velike štete na mrijestilištu. Prisljeni smo bili prolongirati plan do obezbjeđenja sredstava iz drugih izvora (naplate od odštete za buduću gradnju nove MHE, naplata za rad postojećih MHE, naplata od prijave te kroz tendere i natječaje). Možemo reći da smo i pored svih nesreća koje su nas zadesile uspješni ostvariti većinu planiranog. Izvršili smo 5 većih i 4 manja poribljavanja (potoci).

Ukupna novčana tržišna vrijednost svih poribljavanja iznosi oko 13.500,00 KM.

Ovom prilikom odajemo priznanje Komisiji za poribljavanje i svim članovima koji su izvodili akcije poribljavanja za izuzetno kvalitetno obavljen posao. Sva poribljavanja su urađena uz nadzor kantonalne inspekcije o čemu su sačinjeni i Zapisnici o poribljavanju, a sva poribljavanja su fotografirana i objavljena na našoj web stranici izuzev nekih poribljavanja potoka gdje članovi koji su vršili poribljavanja nisu dostavili fotografije za našu arhivu. Opširnije u izvještaju Komisije za poribljavanje.

Izdvojeno je i oko 2.000 komada mlađi potočne pastrmke te je ista donirana osobama koje se zadužile USR Vitez kroz donacije i veliku pomoć pri uzgoju mlađi. Ovaj potez doniranja skromne količine mlađi potočne pastrmke pojedincima i drugim udruženjima su nam donijele donacije kojima se nismo ni najmanje nadali. Doniranje mlađi nam je donijelo finansijsku pomoć za mrijestilište Kremenik od strane SRS FBiH koja je realizirana početkom 2020. godine u iznosu od 1.000 KM, kao i jako vrijednu donaciju od UG "Bistro!" Sarajevo u vidu 6 mušičarskih štapova, 4 čekrka sa strunom i 2 kompletna seta za izradu mušica te im se još jednom zahvaljujemo na ovom vrijednom poklonu.

AKCIJE

Na prostoru na kome smo izgradili Ribarski dom i mušičarsku stazu i u dijelu iznad Vonkovog mosta prema Centrali u 2019. godini je izveden je veliki broj akcija na čišćenju i uređenju obala nakon tri uzastopne poplave. Akcijama su se pored dijela članova odazvali i pojedinci iz lokalne zajednice, djelatnici Ovnaka, djelatnici općine Vitez, MZ Stari Vitez Mahala, HUM Vitez, Ekološko udruženje Kremenik, učenici srednje mješovite škole Vitez, članovi LO Vitez..itd. Sve ove akcije su fotografirane i objavljene na web stranici i facebook profilu Udruge.

- Izvedeno je nekoliko akcija sanacije i uređenja prostora mrijestilišta, košenje, čišćenje, sadnja sadnica i čišćenje svih bazena

AKTIVNOSTI

- I prošle godine smo na imali dogovor za ribolov naših članova na vodama SRD Zlatovčica Jajce, SRD Žepče i SRD Zenica za sve naše članove koji žele loviti na njihovim otvorenim vodama.

- Početkom godine pokrenut je i završen postupak izdavanja Potvrde o zastupanju USR Vitez od strane Ministarstva pravosuđa SBK/KSB što je zakonska obveza. Također smo dobili odobrenje na izmjene Statuta USR Vitez u dijelu koji se odnosi na izbor predsjednika i zamjenika predsjednika, a što je usvojila Skupština USR Vitez u 2. mjesecu 2019. godine čime je stavljen van snage Statut od 2000. godine, a važeći Statut nosi datum 17.02.2019. godine.

- Krajem 2018. godine je istekla Revizija ribarske osnove koja je temeljni dokument svakog udruženja. Obzirom da udruženja nemaju dovoljna finansijska sredstva, SSR SBK/KSB je u zajedničkom nastupu dogovorila sa Ministarstvom vodoprivrede, poljoprivrede i šumarstva izradu Revizije Ribarske osnove koju financira Ministarstvo. Ministarstvo je sredstva u iznosu od 30.000 KM uplatilo na račun SSR SBK/KSB, a na sastanku UO SSR SBK/KSB održanom 31.10.2019. u Travniku od pristiglih ponuda je izabrana ponuda Agronomsko prehrambeno-tehnološkog fakulteta, sveučilišta Mostar (koji su radili i Reviziju 2013. godine-

Revizija vrijedi 5 godina). Upravni odbor SSR SBK/KSB je prihvatio ovu ponudu i ovlastio predsjednika Upravnog odbora Almedina Kolonića da može potpisati Ugovor sa izabranim ponuđačem. Na ovom sastanku su sve članice potpisale Ugovor o zajedničkom finansiranju revizije Ribolovne osnove. USR Vitez su predstavljali Dragan Jonjić predsjednik i Novak Šarić tajnik. Revizija Ribolovne osnove će se raditi tokom ove godine na našim vodama.

UO SRS FBiH je na svojoj zadnjoj sjednici donio odluku da se našem prvom predsjedniku pok. Ludvigu Tiboldu posthumno dodjeli plaketa sa diplomom. Dodjela je planirana na svečanoj sjednici SRS FBiH 07.03.2020. u Kiseljaku.

ZAŠTITA I ČUVANJE RIBLJEG FONDA

Prema Zakonu o slatkovodnom ribarstvu, svaki član, sportski ribolovac, dužan je da čuva riblji fond u vodama koje su nam date na upravljanje, te da poduzima odgovarajuće mjere i radnje na sprečavanju uništenja ribljevog fonda bilo ulovom ribe nedozvoljenim sredstvima bilo zagađivanjem voda. Dovoljno je da svaku uočenu nepravilnost prijavite ribočuvaru, predsjedniku ili članu UO bilo osobno ili putem telefona, a na osnovu toga će se poduzeti neophodne aktivnosti u sprečavanju istih. Na osnovu dojave putem telefona je i izvršena prijava za Lašvicu u Mošunju te je angažirana policija i kantonalna inspekcija.

- Krajem sezone održano je nekoliko akcija na uređenju vodotoka, prilagođavanju protoka vode na izabranim mjestima, izgradnji zaklona za ribu i mjesta za mrijest na stazi. Prirodni mrijest je bio iznad svih očekivanja na kompletnoj dužini staze, te se nadamo, ako ne bude prirodnih nepogoda da ćemo imati novu generaciju potočne pastrmke izmriještenu prirodnim putem.

USR Vitez finansirala je 1 ribočuvara. Također su angažirana 4 člana USR Vitez sa područja Kruščice kao ribočuvari-volonteri koji su dobili ribočuvarske iskaznice. Zadatak je da sačuvaju rijeku Kruščicu i pritoke obzirom da je već treću godinu u ove vode ubačena veća količina mlađi potočne pastrmke iz našeg mrijestilišta. Rezultati rada ove ekipe su odlični jer su uspjeli da spriječe krivolov na rijeci Kruščici i pritokama te im zahvaljujemo i ovom prilikom. Tokom zadnjeg poribljavanja Kruščice uočen je veći broj jedinki potočne pastrmke iz prethodnih poribljavanja što nam govori da je ovo pravi put očuvanja ribljevog fonda rijeke Kruščice.

USR Vitez posjeduje Koncesiju na ribolovno pravo na 130,4 km voda kojem su nam date na upravljanje, a u Ribarskoj osnovi određeno je da na tu dužinu vodenog toka Udruga treba imati zaposlena 3 stalna profesionalna ribočuvara čemu treba težiti. Tokom prošle 2019. godine nadzor i zaštitu otvorenih voda je vršio predsjednik i volonterska služba od 4 člana.

I ove godine smo nabavili petarde i organizirali akcije u cilju zaštite riba od kormorana, i ta aktivnost se uspješno odrađuje.

MUŠIČARSKA STAZA LUDVIG TIBOLD - IZVJEŠTAJ O RADU

Na mušičarskoj stazi LT je organizirano otvorenja sezone 2019. za članove i goste. Staza se održavala cijele godine, a nakon 3 uzastopne poplave uspjeli smo u velikom broju akcija članova, pomoći drugih udruženja, pojedinaca i općine Vitez očistiti i dovesti stazu u prethodno stanje. Krajem sezone staza je uređena i pripremljena za prirodni mrijest potočne pastrmke koji se krajem prošle i početkom ove godine u velikom obimu odvijao na cijelom toku te se nadamo novoj generaciji potočne pastrmke.

Svake godine mušičari BiH organiziraju okupljanje i druženje na nekoj lokaciji u BiH. Prošle godine su odabrali mušičarsku stazu "LT" Vitez za svoje godišnje druženje. 25.08.2019. godine odabrali okupili su se mušičari iz Sarajeva, Zenice, Mostara, Novog Travnika, Breze, Viteza, Danske... Odličnu atmosferu su upotpunili i naši članovi iz Lašvanskih tamburica, a druženje trajalo do večernjih sati. U sklopu druženja je gospodin Vadhet Slijepčević iz Danske poklonio kompletan set za mušičarenje, štap "LOOP", čekrk i strunu našem mladom članu Benjamin Topčić. Ovaj vrijedan poklon je i nas ostavio bez riječi te se još jednom zahvaljujemo gospodinu Vadhetu.

Na mušičarskoj stazi ribolov upražnjavaju članovi i gosti. Za članove USR Vitez ribolov je besplatan poštujući režim ribolova mušičarske staze, nije ograničen broj izlazaka i nisu potrebni taloni. Za goste dnevna karta je 10 KM sa zabranom uzimanja ribe. U 2019. godini stazu su posjetila 32 gosta koji nisu članovi USR Vitez i kojima su naplaćene dnevne dozvole za salmonidne vode izdate od strane SRS FBiH. Naplaćena sredstva se Odlukom UO usmjeravaju za rad i održavanje staze i Ribarskog doma, a od ovog iznosa 10% se vraća savezu FBiH.

Poribljavanje mušičarske staze putem natječaja ReLoAD - UNDP-a (EU) i općine Vitez

Nakon poplava početkom 2019. godine, a u cilju očuvanja vrste te omogućavanja sportsko-edukacijskih i turističko-rekreacijskih aktivnosti Udruga sportskih ribolovaca Vitez se prijavila na Javni poziv za finansiranje nevladinih organizacija (NVO) od strane općine Vitez raspisan 13.03.2019. Projekti ovog tipa su novi način dodjele sredstava općine Vitez i međunarodnih organizacija.,

Udruga sportskih ribolovaca Vitez je u skladu sa razvojnim ciljevima općine Vitez aplicirala sa projektom iz prioritete oblasti Ekologija - Zaštita i očuvanje biljnog i životinjskog svijeta. Predali smo projekt pod nazivom "Očuvanje potočne pastrmke u zaštićenom dijelu rijeke Lašve", a isti je odobren od strane evaluacione komisije općine Vitez.

Ukupno odobrena vrijednost projekta iznosi 5.000 KM, a trajanje projekta je 5 mjeseci zaključno sa 31.12.2019. godine.

Po propozicijama natječaja projekat čine kategorije: Ljudski resursi, glavni projekat i promidžba.

Ljudske resurse čine: - Koordinator projekta – Dragan Jonjić - 5 mjeseci x 50KM, - Održavanje i čišćenje obala i vodotoka – Palić Mirsad - 5 mjeseci x100KM i Ribočuvar nadzor, zaštita i usluge – Naser Topčić - 5mjeseci x300

Glavni projekat čini:

- Priprema vodotoka i obala - volonterski = 0 KM

- Škole i radionice mušičarenja za djecu i početnike - volonterski = 0 KM. Naša obaveza je bila održavanje 3 mušičarske radionice. Nakon održane 3 mušičarske radionice zbog pokazanog interesa nastavili smo iste održavati svake nedelje u terminu od 13.00-15.00 sati i do kraja 2019. godine održano je 8 radionica gdje su polaznici osposobljeni za samostalno pravljenje mušica, a nabavljen je i dio alata i materijala kroz poklone i donacije. Voditelj radionica je Nono Šarić, a demonstratori su bili Anto Matošević Lord i Marjan Azinović.

- Poribljavanje staze (sanacija ribljeg fonda nakon poplava) - nabavljena je riba u količini 300 kg te je poribljena mušičarska staza pod nadzorom kantonalne inspekcije.

Sa koordinatorom projekta, održavanje i čišćenje obala i vodotoka kao i ribočuvarom je po propozicijama natječaja sačinjen Ugovor o djelu za period trajanja Projekta.

Dana 10.09.2019. godine predstavnici općine Vitez i UNDP-a gdja. Katica Radman, stručni suradnik za prosvjetu, sport, kulturu, informiranje i udruge građana i gdjica. Tea Mišković koordinatora za projekte su nas posjetili u Ribarskom domu te je izvršena kontrola i analiza prvog dijela projekta. Prezentirani su računi, zapisnik kantonalne inspekcije, fotografije akcije i Ugovori. Obzirom da je ovo prvi projekat koji radimo na ovaj način zadovoljni smo urađenim prvim dijelom, te uz stručne sugestije i svesrdnu pomoć predstavnika Općine i UNDP-a smo kvalitetno dovršili i drugi dio Projekta.

Na tri Ugovora o djelu su plaćeni porezi i doprinosi po obavezama iz tendera u iznosu 418,40KM, a sredstva za ovu namjenu su uplanirana u sklopu Projekta. Ovi porezi su plaćeni početkom 2020. godine za prethodnih pet mjeseci čime smo završili sa projektom. Izvještaj o realizaciji Projekta je predat Komisiji na evaluaciju UNDP-a i općine Vitez početkom godine, a čine ga izvještaj uz prateće fotografije svake aktivnosti, svi računi, zapisnici, ugovori i potvrde o plaćenim porezima i doprinosima. Izvještaj je prihvaćen čime smo završili realizaciju projekta.

TAKMIČENJA

U protekloj 2019. godini naši članovi su nastupili na nekoliko takmičenja kantonalnog, federalnog i državnog nivoa.

OSTVARENI REZULTATI U 2019.

- Član USR Vitez Anto Matošević je po osnovu rezultata u 2018. godini ostvario pravo nastupa u Premijer ligi mušičarenje za seniore u 2019. godini pri čemu je osvojio 13.mjesto u konkurenciji 24 takmičara.

- 04.08.2019. godine na rijeci Vrbas u Donjem Vakufu održano je Prvenstvo SRS FBiH u mušičarenju, ekipno i pojedinačno. USR Vitez predstavljao Anto Matošević u pojedinačnoj konkurenciji.

- Dana 29.09.2019. godine održano je prvenstvo BiH za mlade u disciplini musicarenje kategorija do 18 godina u Busovači na rijeci Lašvi. USR Vitez su predstavljala braća Adin i Benjamin Topčić. Naši takmičari su poslije prvog sektora zauzimali 4. i 6. poziciju, da bi nakon drugog sektora (većina pripremljenih mušica

je već ostala na okolnom drveću :)) osvojili 7. i 8. mjesto, te se nisu uspjeli plasirati u reprezentaciju BiH i ove godine ići na svjetsko prvenstvo za mlade. Reprezentaciju čine prvih 6 takmičara.

- 20.10.2019. godine održano je prvenstvo SBK/KSB u mušičarenju na takmičarskoj stazi Busovača. Ekipe USA Vitez je nastupila u pojedinačnoj i ekipnoj konkurenciji sa 3 člana. U pojedinačnoj kategoriji I mjesto je osvojio naš takmičar Anto Matošević, a u ekipnoj konkurenciji osvojeno je II mjesto. U ekipnoj konkurenciji USA Vitez su predstavljali, Dominik Garić, Zoran Šakić i Anto Matošević. Čestitamo na postignutim rezultatima.

- 09.11.2019. godine Međunarodni Kup u mušičarenju, Split-Žrnovnica-RH. Peto mjesto u jakoj međunarodnoj konkurenciji Anto Matošević. Čestitke!

RIBOGOJILIŠTE KREMENIK

Nakon poplava 2019. godine i nastalih šteta ponovo smo formirali matično jato potočne pastrmke uzrasta 30-65 cm koje broji oko 300 komada jedinki. Zdravstvenu ispravnost tokom ciklusa uzgoja nadzire federalna, kantonalna i općinska veterinarska inspekcija. U svrhu poribljavanja sa ribljom mlađi ili ribama za sezonu 2019./2020. izvršen je pregled mrijestilišta Kremenik kao i kontrola zdravstvene ispravnosti i zdravstvenog stanja riblje populacije na mrijestilištu. 16.12.2019. godine uzeti su uzorci kože/peraja, škrge i crijevnog sadržaja za adspekcijski, sekcijski i mikroskopski pregled. Pregled i uzimanje uzoraka su izvršili stručnjaci Veterinarskog fakulteta-veterinarskog instituta odjeljenja za akvakulturu Sarajevo i nadležne inspekcijske službe ministarstva poljoprivrede, vodoprivrede i šumarstva SBK/KSB o čemu je sačinjen Zapisnik.

Štete koje smo imali zbog prošlogodišnjih poplava smo nadoknadili iz sredstava po odštetnim zahtjevima i tenderima prema nadležnim ministarstvima, kao i spašenim dijelom mlađi potočne pastrmke u mrijestilištu.

Najugroženije vrste salmonidnih voda su lipljen i mladica. Udruga sportskih ribolovaca je u prioritet stavila formiranje matičnog jata mladice, a trenutno stanje je 5 jedinki mladice uzrasta 60-95 cm. Obzirom da je mladica najugroženija riba u Europi, USA Vitez pokušava već par godina vještački mrijestiti ovu ribu pri čemu nailazimo na mnogobrojne probleme ali ne mislimo odustati.

- Dana 02.03.2019. godine izvršena je akcija kontrolnog izlova specijalnim elektroagregatom uzgojnog potoka i potoka Kremenik kako bi utvrdili obim nastalih šteta od poplave.

- 19.10.2019. izvedena je akcija sanacije dovoda vode u unutarnje bazene u objektu mrijestilista. Veliki problem je predstavljalo konstantno odronjavanja obala (zemlje) pri čemu je mulj ulazio u vanjski i unutarnje bazene. Kako bi to izbjegli uveli smo dovodni potok u cijevi. Položeno je 5 cijevi, dužine 6 metara, promjera fi 300 sa spojnicama u ukupnoj dužini 30 metara. Ovim radovima se značajno olakšalo održavanje vanjskog i unutarnjih bazena, te je spriječeno štetno djelovanje mulja na matice, ikru i mlađ.

- 26.10.2019. je održana završna akcija na sanaciji i pripremi dovodnog potoka za vanjski i unutarnje bazene u objektu mrijestilišta pred nastupajući mrijest potočne pastrmke. Izvršeno je betoniranje dna i obala otvorenog dijela potoka, a izvršeno je i uređenje protora na kom se nalazi mrijestilište.

Ribogojilište Kremenik je prošle godine uzgojilo jako kvalitetnu riblju mlađ potočne pastrmke te je ista u uzrastu od 6-8cm u količini 35.000 komada ubačena u Kruščicu i sve pritoke Kruščice i sa 15.000 komada u sve ostale pritoke rijeke Lašve. Trenutno stanje u mrijestilištu je slijedeće: cca 60.000 komada mlađi potočare u fazi mlađi, larvi i oplodene ikre, 300 komada matica potočare i 5 jedinki matičnog jata mladice.

ZAKLJUČAK

Vođenje Udruge u prethodnom periodu je bila ogromna obaveza koja zahtjeva rad, trud, odricanje i jako puno izdvojenog vremena, a sve što se radilo radilo se na volonterskoj bazi. Znamo da će uvijek biti nezadovoljnih bez obzira tko vodio Udrugu, i šta, koliko i kako uradio.

Na kraju možemo reći da smo i više nego ponosni vidljivim rezultatima rada u prethodnom periodu, a naročito na ugled koji je USA Vitez stekla svojim radom i zalaganjem.

Ispred UO i NO i u svoje osobno ime zahvaljujem se dosadašnjem predsjedniku Draganu Jonjiću za sve što je uradio u prethodnom periodu, osobi kojoj možemo zahvaliti sve što smo dosad stekli, koji je ogroman broj akcija sam uradio, borio se sa zagađivačima, suprotstavljao se tajkunima, trpio napade, ogovaranja, pokrenuo i dovršio projekat mrijestilišta, mrijestio ribu i poribljavao, kontrolirao vodotoke i vodio borbu protiv krivolova. Također, zahvala ide i našem ribočuvaru Naseru Topčiću, izuzetno vrijednom čovjeku, a svi znate šta Naser radi i koliko nam znači. Hvala još jednom obojici!

Bistro vam želim u novoj sezoni!

Izvještaj podnio
Novak Šarić – tajnik